

Gewunne!

Omm Moondaachowend noch spät klingelt bei uns dess Telefon, isch drigg uff de griene Knobb unn schunn hott ooner außem Telefon eraus gekrische: Gewunne, isch habb gewunne! Juhuu!

Dess iss schee ferr Ihne, habb isch nitt su laut gesaad, awwer was hebben isch doodemett se due, wer sinn Sie donn iwverhaupt?

Doo kreischt ooner: Ei isch bins doch, de Schorsch.

De Schorsch?, frooch isch, was donn ferrn Schorsch?

Nooch ooner Paus seet der: Ei Honnes, doin ahle Kummbeer Schorsch.

Dess kann nitt soi, saach isch, de Schorsch dut sisch nemlich nitt onn irschendebbes beteilische, wo merr ebbes gewinnen kann, dess hodder merr schunn vor längerem gesaad unn isch mach dess aach nitt.

Honnes, seet de Schorsch schunn gar nimmi su laut, dess isses joo. Isch due nirschendwo mettmache unn uff oomol habb isch doch gewunne.

Isch frooch: Wifell hosden gewunne, Schorsch?

Doo gibbder ze Antwort: Fuffsischdausend Euro.

Aha, saach isch, unn woher waaßden dess?

De Schorsch e bissi verschämt: Ei isch binn grad vorhin oogerufe wormn unn su e nett Fraasche hott misch gefroochd, ob isch der odder der wär, weil isch doch vill Geld gewunne hädd. Unn doo frächt se misch noch, ob isch dess Geld aach werklisch hawwe wollt, weil dess deet joo schnell verfallene unn donn deet isch nix kriehe. Es missde nor noch su e paar Formalideede besproche wernn unn ob isch doo grad Zeit deferr hädd. Also isch soll ferr die Notarkosde unn dass alles soi Ordnung hädd achthunnerd Euro Bargeld oom gewwe, der omm Mittwoch um elf Uhr onn die Hausdier käm, isch deet enn gleich erkenne, er hädd e Security-Jack oo, awwer weesche dem Corona enn Mundschutz, isch sollt nitt verschregge. Dem soll isch dess Geld gewwe unn aach moi Kontonummer uff enn Zeddel schreibe, donn kennde se dess Geld noch omm sellwe Daach iwverweise. Honnes, achthunnerd Euro gewwe unn fuffsischdausend kassiern, dess iss doch e Geschäft, odder?

Isch haddem zugeheerd unn allsfort gedenkd, bald duder saache dasser dess alles nor getroomd hott, denn su dumm iss de Schorsch nitt, dasser nitt wisst, dass schunn vill Leit uff die Art unn Weis enn Haufe Geld verlorn hawwe, also frooch isch: Schorsch, unn du willst werklisch dem Security-Monn achthunnerd Euro gewwe?

De Schorsch hott laut gelacht. Honnes, du host doch gut zugeheerd, odder? Donn saach isch derr jetzt, dass su wie isch dir dess verzähld habb genau su emm Niko, emm ehemalische Kolleesch vunn mir aus Bauschem, bassierd iss, awwer der hadd nodierlich aach gemerkt, dass dess e Gaunerei iss. Also hodder sisch scheinbar druff oigelosse unn wie de Security-Monn vor de Hausdier war hott ooner vumm Niko soine große Enkel meddem Händy in de Hond die Dier uffgemachd unn hott ohne irschend ebbes se saache den Kerl fotografiert. Schorsch, hott de Nico gesaad, der iss su schnell fortgerennnd, isch glaab derr hott de Weltrekord im Hunnerdmeter-Laafe nei uffgestellt. No ja, Honnes, isch deet dess joo nitt su mache.

Isch aach nitt, saach isch, gleich de rode Knobb omm Telefon drigge iss dess oonsisch Rischdische.

Eiern Honnes